

Terenga 5: Hōtaka 8 – Te Rerenga ‘He ...nō...’

He Mihi

Mai i te rangi e tū iho nei, ki te whenua e takoto ake nei, ko te reo o Ako tēnei e pāhotia nei hei whakarongo mā taringa areare, hei hopu mā hinengaro mahea, hei kapo mā wairua whakapono ki te mana o te reo Māori. He kohinga akoranga kei tēnei hōtaka mā te hunga e taunga ana ki te ako i te reo ki te reo tonu, me te aha, ina wara ana te ngākau ka tutuki tā te tauira e whai nei kia paku mōhio ake i tāna i mōhio ai i mua. Mā te aha pea i tēnā, nē rā?

Hei Mahi Whakarongo

He kaupapa muna te pūtake o te mahi whakarongo o tēnei rā. Ka rongo tātou i a Wharehuria rāua ko Tīmoti e kōrero ana mō te whakatūnga o taua kaupapa muna.

Anei ngā pātai hei whakautu mā koutou:

- 1) I tū te hui ki hea?
- 2) Nā wai i āwhina kia muna ai?
- 3) He aha ngā whakaritenga ake a Tīmoti?

Kia whakarongo ināianei ki ngā whakaritenga whakakumu mō te rā whānau muna o te Toka-ā-nuku o te reo.

He Whakamārama

Me hoki tātou ki te titiro anō ki te whakatakotoranga nei e kawea ana i te tikanga o te kōrero 'nā te mea', he hē tonu nō te whakamahinga o te kōrero nei e ētehi kaikōrero.


- He...nō... = Nā te mea...
 - a) He kaha nōku ki te oma. *Because I am a strong runner.*
 - e) He hiahia nōku ki te haere. *Because I want to go.*

He pai ēnei rerenga hei whakautu, engari ki te ngaro te pātai hei whakatau i te horopaki, kāore anō tēnei kōrero kia oti pai. Tirohia ngā kōrero hei whakautu i te pātai:

- a) He aha koe i toa ai? He kaha nōku ki te oma. ✓
- e) He aha koe e pōuri nā? He hiahia nōku ki te haere, engari kua wehe te waka. ✓

He Mahi Ī-papa

Hurihia te rerenga kia uru ai te 'He...nō' ki te rerenga hou:



Hei Mahi

Panonihiā ngā rerenga e whai ake nei kia uru ai te 'He...nō' ki te rerenga hou:

1. I haere au nā te mea i hiahia taku hoa ki te haere.
2. I te mea e kaha ana tana reo, nāna i tuku te pānui.
3. Kua puta tana ihu nā te mea i ū ia ki āna mahi.
4. E tangi ana te tama, nā te mea e whakamā ana ia.

Whakautu:

Mahi Ī-papa: He hiahia nōku ki te tautoko, i tae moata atu ai au ki te marae.

1. I haere au, he hiahia nō taku hoa ki te haere.
2. Nāna i tuku te pānui, he kaha nō tana reo.
3. Kua puta tana ihu, he ū nōna ki āna mahi.
4. E tangi ana te tama, he whakamā nōna.